

63.3
P 15

ЎЗБЕКИСТОН ТАРИХИНИНГ ЯНГИ САҲИФАЛАРИ



Қ. Қ. РАЖАБОВ

**МУСТАКИЛ
ТУРКИСТОН
ФИКРИ УЧУН
МУЖОДАЛАЛАР**

“ЎЗБЕКИСТОН”

633
P-15-

ЎЗБЕКИСТОН РЕСПУБЛИКАСИ ФАНЛАР
АКАДЕМИЯСИ ТАРИХ ИНСТИТУТИ

Қ. К. РАЖАБОВ

МУСТАҚИЛ
ТУРКИСТОН ФИКРИ
УЧУН МУЖОДАЛАЛАР

(1917—1935 йиллар)



ТОШКЕНТ "ЎЗБЕКИСТОН" 2000

Масъул муҳаррир:
тарих фанлари доктори *Д. А. Алимова*

Тақризчи:
тарих фанлари доктори *С. С. Аъзамхўжаев*

Муҳаррир *З. Каримова*

P 0503020904 – 24
M351(04)2000 2000

ISBN 5-640-02816-5

© “ЎЗБЕКИСТОН” нашриёти 2000 й.

*Туркистон мустақиллиги учун
жангларда құрбон бұлған истиқол-
чиларнинг порлоқ хотираларига ба-
ғишилайман.*

ТУРКИСТОН МУХТОРИЯТИ ҲУКУМАТИ

Туркистондаги жадидчилик ҳаракати 1917 йил февральдан октябрғача бұлған қисқа муддат ичидә жиғдий үзга-ришларни бошдан кечирди. Жадидчилик айнан ушбу даврда маърифатчилик ҳаракатидан сиёсий ҳаракат дара-жасига күтарилди.

1917 йил март ойида Тошкент шаҳрида жадидчилик ҳаракати раҳбарлари “Шурови Исломия” ташкилотининг атрофига бирлаштылар. Жадидлар жойларда “Шурови Исломия” тизими яратилишининг ташаббускори бұлдылар.

Жадидларнинг саъй-ҳаракатлари туғайлы қисқа муддат ичидә түрт марта Бутунтуркестон мусулмонлари курултойи үтказылди. 1917 йил 16—23 апрелде бұлған бириңчи курултойда демократик Россия таркибида Туркестон Мухториятини ташкил этиш ғояси илгари сурыйлди. Курултой доимий ижроия ташкилот — Туркестон мусулмонларининг Марказий Шүроси (Үлкамуссовет)ни таъсис этди. Ахмад Закий Валидий үзининг машхур “Хотиралар” китобида кейинчалик ёзишича, Туркестон мусулмонлари Марказий Шүросига Мустафо Чұқаев раис, у бош котиб, Мунаввар Қори, Обиджон Маҳмуд, Маҳмудхұјжа Бекбұдай, Убайдулла Хұжаев ва бошқалар аъзо бўлиб сайланди¹.

Бутунтуркестон мусулмонларининг иккинчи қурултойида (1917 йил сентябрь) фақат мусулмон депу-

¹ Ахмад Закий Валидий Тұғон. Бұлинғанни бүри ер. Туркестон халқарининг миллий мустақиллик учун кураши тарихидан хотиралар. Тошкент, “Адолат”, 1997, 48-бет.

татларнинг улка Шўроси Туркистон мусулмон аҳолиси манфаатларини ҳимоя қилиши мумкин, деган фикр қатъий қилиб қўйилди¹. Мусулмонлар Шўроси ҳокимиятни ишчи ва солдат депутатлари Советига берилишига қарши эканликларини очиқ айтишди. Афсуски, кучлар нисбати 1917 йил октябрь ойига келиб Марказда ҳам, унинг “чекка үлкаси” саналган Туркистонда ҳам ўзгарган эди.

Большевиклар томонидан Петроградда амалга оширилган Октябрь тунтариши Туркистон халқларининг озодлик ва мустақилликка эришиш тұғрисидаги умидларини оқламади. Большевиклар ҳукуматининг раҳбарлари томонидан халқларнинг үз тақдирини үзи белгилаш ҳукуқи ҳақидаги эълон қилинган дабдабали декларациялар² амалда бир парча қофоздан иборат қуруқ ташвиқот булиб чиқди. Туркистонда ярим асрдан ортиқ давом этган мустамлакачилик зулми 1917 йилнинг охира ида ҳам ўзгартмади, фақатгина ниқоблар алмаштирилди, холос. “Рус инқилобий демократияси чоризмдан реакционроқ иш тутди”³, — деб таъкидланади ўша давр хужжатларининг бирида. Бу ҳол большевикларнинг үлка-даги муҳторият ҳаракатига нисбатан бўлган муносабатида ҳам яққол кўринади.

Қўқон шаҳрида 1917 йил 26 ноябрда очилган Үлка мусулмонларининг IV фавқулодда қурутойида ТУРКИСТОН МУХТОРИЯТИ ҳукумати тузилганлиги эълон қилинди⁴. Қурутой Бутунrossия таъсис мажлиси чақирилгунга қадар ҳокимиятни янги тузилган Туркистон Мувакқат Кенгаши ва Туркистон Халқ (Миллий) мажлиси қулига берди. “Улуғ Туркистон” газетасида ёзилишича, мувакқат ҳукумат таркибига Муҳаммаджон Танишбоеv Бош вазир, ички ишлар вазири, Ислом Султон Шоаҳ-

¹ Истиқлолимизнинг тарихий илдизлари (давра сұхбати), “Шарқ юлдузи”, 1995, №11-12, 5-бет.

² Бу ҳақда қаранг: В. И. Ленин Ўрта Осиё ва Қозогистон тұғрисида. Тошкент, “Ўзбекистон” 1984, 489-491, 492-495-бетлар.

³ Ўзбекистон Марказий давлат архиви (Ўзбекистон МДА), 17 фонд, 1-рўйхат, 45-иш, 382-варақ.

⁴ Қаранг: С. Абзамхўжаев. Туркистон Мухторияти. Тошкент, “Фан”. 1996, 32-33-бетлар.

медов — Баш вазир ўринбосари, Мустафо Чўқаев — ташқи ишлар вазири, Убайдулла Хужаев — ҳарбий вазир, Юрали Агаев — ер ва сув бойликлари вазири, Обиджон Маҳмудов — озиқ-овқат вазири, Абдураҳмон Ўразаев — ички ишлар вазирининг ўринбосари, Соломон Абрамович Герцфельд — молия вазири сифатида киритилди¹. Орадан кўп ўтмай жумхурраис вазифасини М. Танишбоев ўрнига ҳуқуқшунос М. Чўқаев бажаришга киришди.

Афсуски, Туркистон Мухторияти ҳукумати 72 кун яшади. 1918 йил 19—22 февралда Қўқон шаҳрида фаолият курсатётган мазкур ҳукумат қизил аскарлар найзаси остида ағдариб ташланди. Қўқон шаҳри босқинчилар томонидан аёвсиз таланди, фақат уч кун ичида ўн мини кишига яқин қўқонлик улдирилди.

ФАРГОНА ВОДИЙСИДАГИ ИСТИҚЛОЛЧИЛИК ҲАРАКАТИ ВА УНИНГ МОҲИЯТИ

Ватан туйғусидек муқаддас туйғу қалбининг туридан жой олган Туркистон мунаварларининг мухторият, Туркистон тақдири, миллий истиқбол, эрк ва ҳурлик учун олиб борган курашлари бу ҳукумат тор-мор қилинса-да, изсиз кетмади. Ёниб кулга айланган гулхан ичидан Қақнус күш қайта чиққанидек, Туркистон Мухторияти ҳукумати мағлубиятга учраса-да, у Фаргона водийсидаги ИСТИҚЛОЛЧИЛИК ҲАРАКАТИни² “ташкилий расмийлаштириди, унга миллий бўёқ ва тус берди”³. Демак,

¹ “Улуғ Туркистон”, 1917 йил 13 декабрь.

² Ушбу ўринда сўз “босмачилик” деб нотугри номланган ҳаракат устида кетмоқда. “Босмачи” ва “босмачилик” иборалари миллий озодлик ҳаракатининг моҳиятини соҳталаштириш, аждодларимизнинг Россия зулми ва большевиклар ҳукмронлигига қарши олиб борган қонли курашларини хаспўлаш учун буюк давлат шовинистлари томонидан ўйлаб топилди ҳамда “бандитлик”, “қароқчилик” деган сўзлар билан асоссиз равиша бир қаторга кўйилди.

Хайриятки, Узбекистон Республикаси мустақилликка эришгач, “босмачилик” ёрлиги ёпиширилган ота-боболаримизнинг муборак номлари қайта тикланди ва улар ўзларининг асл қиёфалари билан бизга пешвоз чиқишиди. Шунинг учун ҳам мазкур тадқиқотда “босмачи” ва “босмачилик ҳаракати” сўзлари истиқболчи ва истиқдолчилик ҳаракати атамалари билан алмаштирилди.

³ Ўзбекистон МДА, 17-фонд, 1-рўйхат, 336-иш, 224-варақ.

Туркистанда совет ҳокимияти ва большевикча режимга қарши истиқлолчилик ҳаракатининг бошланишини хронологик жиҳатдан 1918 йил февраль ойининг сүнгги ўн кунлигига деб белгилашимиз мумкин.

Дастлабки истиқлолчи гурухларнинг тузилиши Қўқон атрофидаги Бачқир қишлоғидан бўлган Кичик ва Катта Эргашларнинг номлари билан узвий боғлиқдир. 27 февралдаги жангларнинг бирида КИЧИК ЭРГАШ шаҳид бўлгач, унинг ўрнига КАТТА ЭРГАШ қўрбоши (уни Мулла Эргаш ҳам дейишган) Фарона водийсида большевикларнинг мустамлакачилик тартибига қарши озодлик байрофини кутарди. Совет ҳокимияти ва большевикларга қарши миллий истиқлол ҳаракатини ташкил қилишдек буюк ва шарафли вазифа энди унинг зиммасига тушди.

Мулла Эргаш қўрбоши кутарган мустақиллик туфи остида Фарғонадаги советлар тузумидан норози юзларча ва мингларча кишилар бирлашдилар. Маркази Бачқир бўлган Қўқон уезди истиқлолчилик ҳаракатининг дастлабки таянч нуқтаси бўлиб қолди. 1918 йил март ойининг охирига келиб Катта Эргашнинг номи Фарона водийси аҳолиси ўртасида жуда машхур бўлиб кетди¹.

Совет айғоқчиларидан бирининг маълумотига кура, “Эргаш қўрбошининг мусулмон ва рус аҳолиси ўртасида пайдо булиши олқишиларга сазовор бўлди, унга энг юксак тилаклар тиланди ҳамда унинг қиёфасида Андижон ва Қўқонда ўнашган совет қушиналаридан, хукумат вакилларидан ва ҳар қандай зўравонликдан халос қилувчи инсонни кўрдилар”².

Истиқлолчилик ҳаракатини ягона қўмондонликка бўйсундириш мақсадида “Шурои Исломия” ва “Шурои Уламо” ташкилоти аъзоларининг ташабbusи билан 1918 йил март ойининг охирида Бачқир қишлоғида Фарғонадаги бутун қўрбошиларнинг биринчи қурултойи чақирилди. Унда 40 дан ортиқ йирик қўрбошилар қатнашди³. Фарона водийсидаги истиқлолчилик ҳарака-

¹ Ўзбекистон Республикаси Президенти девонининг архиви (Ўзбекистон РПДА), 60-фонд, 1-рўйхат, 49-иш, 25-варап.

² Ўзбекистон РПДА, 60-фонд, 1-рўйхат, 49-иш, 3-варап.

³ Ш. А. Шамагдиев Очерки истории и гражданской войны в Ферганской долине. Тошкент, “Фан”, 1961, 61-62-бетлар.

тининг бошлиғи этиб ҳалок бўлган Кичик Эргаш ўрнига энди Катта Эргаш сайланди ва унга бутун мусулмон қушиналарининг Олий бош қўмондони — “Амир-ал-муслимин” унвони берилди. Эргаш қўрбошининг ўринbosарлари қилиб Мадаминбек ва Шермуҳаммадбек тайинланди.

Скобелев уездиде эса миллий озодлик машъалини Марфилон милициясининг сабиқ бошлиғи Муҳаммад Аминбек Аҳмадбек ўғли — МАДАМИНБЕК (1892—1920 й.) кўтарди. “Яккатут волости Гарбобо қишлоғидаги Мадаминбек гуруҳининг қароргоҳига оммавий равишда маҳаллий ёшлар келиб қўшиларди”¹ — деб ёзилади 1918 йилга оид архив хужжатларининг бирида.

“Уз олдига совет ҳокимиятини афдариш ва Фарғона мухториятини тиклаш вазифасини қўйган Мадаминбек тадбиркор сиёсатчи ва уддабурон ташкилотчи фазилатларига эга эди”², — деб тан олинади бошқа бир расмий хужжатда.

Мадаминбек йигитлари ўртасида ҳарбий интизом кучли эди. Мадаминбекчилар босқинчи ва ўғриларни ўзлари ушлаб, жазосини беришарди.

Мадаминбек сиймосида саркардалик, давлат ва сиёсат арбобига хос сифатлар мужассам эди. У Фарғона во-дийсидаги истиқлолчиларнинг ҳақиқий маънодаги доҳийси, тан олинган йўлбошчиси эди. Мадаминбек во-дийдаги совет ҳокимияти органларига муқобил равищда ўз сиёсий бошқарув усулини жорий қилди. Бундай бошқарув усулини яна Эргаш ва Шермуҳаммадбек қўрбосиларгина жорий қилган эдилар. “У бизнинг раҳбарлик фаолиятимизда йўл қўйган хато ва камчиликларимиздан усталик билан фойдаланаарди. Унинг ўз “бошқарув аппарати”, ўзининг трибунали, ўзининг “генштаби” бўлган; у қонунлар чиқарган”³, — деб эътироф қиласи Мадаминбекка қарши курашган душманларидан бири Граматович.

¹ Фарғона вилояти давлат архиви (Фарғона ВДА), 121-фонд, 1-рўйхат, 39-иш, 247-варақ.

² Россия давлат ҳарбий архиви (РДҲА), 149-фонд, 108-иш, 161—162-варақ.

³ Война в песках. Москва, 1935, 202-бет.

Умуман олганда, Фарғона водийсида 1918 йилнинг урталариға келиб, тахминан юзга яқин кўрбоши ўз дастлари билан қизил армия қисмларига қарши озодлик байроғи ва исломнинг яшил тугини кўттардилар.

Истиқолчилик ҳаракатининг ҳарбий бирликка алоқаси бўлмаган қуролли безорилик, бандитлик ёки босмачилик ҳаракати эмаслигини биз юқорида **ҳам** таъкидлаб ўтдик. Истиқолчилик ҳаракатининг ўзига хос миллий характеристери ва Туркистонга мос хусусиятлари бўлган. Ҳаракатнинг кейинги ривожланишини баён қилишдан аввал унинг худди ана шу ўзига хос хусусияти ва асосий мақсадини аниқлаб олиш зарур.

Ҳаракатнинг бошдан охиригача бир устувор foя ётадики, бу БУТУН ТУРКИСТОННИНГ МИЛЛИЙ ИСТИҚОЛИ ВА МУСТАҚИЛЛИГИ foясидир. Истиқолчилик ҳаракати гоҳ кучайиб, гоҳ пасайиб, унда иштирок этувчиларнинг таркиби алмашиб, иккиласми манфаатлар ўзгариб туришига ҳамда объектив ва субъектив омиллар кучлар мувозанатига салбий таъсир қилишига қарамай, ҳаракатнинг асосий мақсади ТУРКИСТОН МУСТАҚИЛЛИГИ булиб қолаверади.

Мадаминбек 1919 йил 11 марта Фарғона фронти қушилари қўмондони М. В. Сафонов номига йўлланган мактубида истиқолчилар қандай мақсад йўлида курашаётганликларини, бу ҳаракатнинг моҳияти ва “босмачи” деб кимни айтиш лозимлигини яққол курсатиб берган: “Гапнинг лўндасини айтсан, бизнинг ҳалқимиз ўз турмушида Карл Маркс ёки большевиклар дастурини қўллаш даражасида ҳали онги ривожланмаган ... Туркистонда бўлса, яна қайтараман, Сизлар қиладиган иш йўқ ва бу ерда зуравонлик билан душманлар ортирасиз, холос... Сиз федерация тузилади деб эълон қилдингиз, сиз ҳалқнинг ўз тақдирини ўзи белгилаш ҳуқуқини эълон қилдингиз, шундай экан, нега сиз уларни бизга бермайсиз? Ёки бизнинг фақат мусулмон бўлганлигимиз учунми?! Бизга кўнглимиз тусаганча яшашга имкон беринг, майли, сиз эълон қилган шиорларга биз амал қиласиз, бизларга ўзимиз хоҳлагандек бошқарув усулини танлашга имкон беринг, ахир, биз — му-

сулмонлар күпчиликни ташкил қиласыз-ку. Аммо зұра-
вонлик қилманг...”¹.

Совет ҳокимияти вакилларининг бутун Туркистан үлкәсіда юритган шовинистик ва мустамлакачилик сиёсати, маңаллый ақоли манфаатлари билан ҳисоблашмай уларнинг нафсониятига тегиши истиқлолчылық ҳаракатининг доимий равища авж олиши ҳамда унинг узлуксиз давом этишига олиб келди.

Фарғона водийсидеги истиқлолчылық ҳаракати 1919 йил ёзининг охири ва күзида ўзининг эң жаңысынан чықып көрді. Мадаминбек бошчилигидеги ислом қүшинлари сафига Жалолободда турған рус крестьянлар армиясининг қушилиши водийда совет ҳокимиятини ағдарыш учун реал күч зеди. Сентябрнинг дастлабки күнларида Мадаминбек лашкарлари Жалолобод шаҳрини әгаллашды². Куршоб қасабаси (посёлка) ёндаги жангларда совет армияси қысмлари катта мағлубиятта учраб, Ўш шаҳрига чекинди³.

“Ўш — Фарғонанинг ҳаёт-мамотини белгилайдиган шаҳар”⁴ булиб, ҳарбий стратегик жиһатдан жуда курай жойда жойлашған зеди. У Фарғона водийсіни, умуман, Туркистан Республикасіни Хитой, Афғонистон, Ҳиндистон, бу томони Бухоро билан боғлайдиган йүлларнинг устида зеди. Ўш шаҳри “жағон томи” — Помир рұпарасыда булиб, ундан Гульча ва Эргаштомдаги чегара пунктларига олиб борадиган йүл үтарди. 8 сентябрда бир ярим суткалик қызғын жанглардан кейин Ўш шаҳри гарнizonи таслим бўлди, қамоқхонада ётган маҳбуслар истиқлолчилар томонидан озод қилинди⁵. Мадаминбек бошчилигидеги армия тантана билан шаҳарга кириб келди. Ўш шаҳрида 9 сентябрда бўлган катта митингда Мадаминбек ёрқин нутқ сўзлади. Митингда қатнашганларнинг гувоҳлик беришича, Мадаминбек ирод этган нутқда истиқлолчи-

¹ РДХА, 28113-фонд, 1-рўйхат, 1-иш, 1-варап, 149-фонд, 1-рўйхат, 51-иш, 53-варап.

² РДХА, 110-фонд, 2-рўйхат, 26-иш, 19-варап.

³ РДХА, 110-фонд, 3-рўйхат, 163-иш, 29-варап.

⁴ РДХА, 149-фонд, 75-иш, 48-варап.

⁵ РДХА, 25859-фонд, 1-рўйхат, 44-иш, 42, 328-варап.

лик ҳаракатининг сиёсий моҳияти, истиқлолчиларнинг мақсадлари очиб берилди¹.

Мадаминбек қүшинлари 13 сентябрда Эски Марғилон шаҳрини эгаллади. Шу билан бирга водийдаги энг йирик стратегик шаҳар — Андижонни қамал қилишга киришди. Бир ой давомида Фарғона водийсини ларзага келтирган Мадаминбек бошчилигидаги мусулмон қўшинининг ҳужуми пировардида мағлубият билан тугади.

Бироқ илк мағлубият аламини татиган Мадаминбекнинг иродаси синмади. 1919 йил 22 октябрда Помирнинг Эргаштом (Иркештам) овулида бўлган анжуマンда МАДАМИНБЕК бошчилигига ФАРГОНА МУВАҚҚАТ МУХТОРИЯТ ҲУКУМАТИ тузилди. Ҳукумат таркибига 16 мусулмон ва 8 рус, ҳаммаси бўлиб 24 киши киритилди². Мадаминбек ҳукумат бошлиғи бўлиши билан бир қаторда Бош қўмондон қилиб ҳам тайинланди.

1919 йилнинг кеч кузига келиб “Мадаминбек қўл остида 30 мингга яқин йигит”³ қизил армияга қарши истиқлол жангларини олиб бордилар. Бу пайтда Шермуҳаммадбекда 20.000 йигит, “Эргаш қўрбошида 8.000 йигит бўлган”⁴. Айнан ушбу учта лашкарбоши водийдаги жанговар ҳаракатларни йўналтириб турганлар.

1919 йил октябрнинг сўнгги кунларида Фарғона водийсидаги барча йирик қўрбошилар Ойимқишлоқда тўпланди. Истиқлолчилик ҳаракати тарихидаги ушбу энг йирик қурултойда, архив ҳужжатларининг далолат беришича, Фарғона водийсида ҳаракат қилаётган 150 тача қўрбоши дасталари тўртта йирик лашкарбоши: Мадаминбек, Эргаш, Шермуҳаммадбек, Холхўжа Эшон қўмондонлиги остида бирлаштирилди⁵. Қурултойда ислом қўшинларининг Олий бош қўмондони — “Амир-

¹ РДҲА, 25859-фонд, 1-рўйхат, 44-иш, 320-варақнинг орқаси, 329-варақ.

² РДҲА, 149-фонд, 1-рўйхат, 51-иш, 77-варақ.

³ Фарғона ВДА, 435-фонд, 1-рўйхат, 220-иш, 102-варақ.

⁴ РДҲА, 110-фонд, 1-рўйхат, 43-иш, 139-140-варақлар.

⁵ РДҲА, 149-фонд, 1-рўйхат, 75-иш, 48-50-варақлар.

ал-муслимин” қилиб яна қайтадан Мадаминбек сайланди.

Бироқ Фарфона водийсига тобора құшымча күчларнинг ташланиши натижасида 1920 йил январь ойининг ўрталырига келиб жанговар ташаббус қизиллар қулига үтди. Катта Эргаш қўрбошининг¹ қўшини мағлубиятта учрагач, Шермуҳаммадбек асосий күчларини олиб Олой воҳасига чекинди. Мадаминбек вақтдан ютиш учун Фарфона фронти қўшинлари қўмондонлигига яраш музокаралари бошлашни таклиф қилди. Натижада мусулмонлар қўшинининг қўмондони Мадаминбек билан 2-Туркистон ўқчи дивизиясининг бошлиғи Веревкин-Рахальский ўртасида 1920 йил 6 марта Скобелев (ҳозирги Фарфона) шахрида яраш битими имзоланди².

Лекин Мадаминбекнинг дигломатик тадбирлари са-марасиз тугади. Советлар томонидан музокаралар ўтказиш учун қўрбошилар орасига юборилган Мадаминбек Шермуҳаммадбекнинг розилиги билан Холхўжа Эшон томонидан 1920 йил 14 майда Қоровул қишлоғида ўлдирildi³.

Совет қўмондонлиги “Мадаминбекнинг ұлими билан Туркистон Мухторияти ва миллий мафкура учун кураш ҳам ўлади”⁴, деб хом хаёлга боришган эди. Мадаминбекни ўлдирган кимса Холхўжа Эшон қўл остидаги Соқи жаллод бўлса-да, аслида унинг ҳақиқий қотили большевикча режим раҳбарлари эди. Чунки Мадаминбек ўртадан кутарилгач, эртасига ёқ истиқолчилардан шафқатсиз уч олишга киришилди. Шундай бўлишига қарамасдан, Туркистон халқларининг истиқдол жанглари 1920 йил ёзи ва кузида ҳам асло тинмади. Фарфона водийси ва Самарқанд вилоятидаги ватанпарварлар билан бир қаторда эндилиқда Бухоро ва Хоразмдаги фидойилар ҳам босқинчи қизил армия жангчиларига қарши муқаддас курашга отландилар.

¹ Архив ҳужжатларида келтирилишича, Катта Эргаш қўрбоши 1921 йил 19 декабрда Хонободдаги қароргоҳида қизил аскарлар билан бўлган жангда ўлдирildi.

² РДҲА, 110-фонд, 3-рўйхат, 285-иш, 40-41, 75-76-вараклар.

³ Ўзбекистон МДА, 17-фонд, 1-рўйхат, 336-иш, 230-варак.

⁴ РДҲА, 28113-фонд, 7-рўйхат, 84-иш, 1-4-вараклар.

Туркистондаги истиқлолчилик ҳаракати 1920 йилнинг ёзи ва кузида ўзининг янги босқичига қадам қўйди. Кураш яна ҳам шафқатсиз ва муросасиз тус олди. Кураш байробини водийда Мадаминбек ўрнига энди ШЕРМУҲАММАДБЕК (1893—1970 й.) кутарди. Фаргона водийсидаги бутун қурбошилар ва тинч аҳоли вакиллари Олтиарик туманидаги Фарибота қишлоғида ўзларининг навбатдаги курултойларига тўпландилар. Курултой 1920 йил 3 майда ТУРКИСТОН — ТУРК МУСТАҚИЛ ИСЛОМ ЖУМҲУРИЯТИ ёки қисқача қилиб айтганда ТУРКИСТОН МУВАҚҚАТ ҲУКУМАТИни тузди. Ушбу курултойда Шермуҳаммадбек ҳукумат раиси ва ислом қушиларининг Олий бош қўмандони — “Амир-ал-муслимин” қилиб сайдланди.

Шермуҳаммадбек кутарган эрк ва истиқлолнинг яшил байроби остида Фаргона водийсидаги бутун қурбошилар тўпланди. Мадаминбек билан бирга ёки ундан олдинмакетин совет ҳокимиятига таслим бўлган қурбошиларнинг аксарияти ва уларнинг йигитлари ҳам Шермуҳаммадбек қушилари сафига келиб қўшилдилар. Большевик маддоҳлардан бирининг эътирофича “Мадаминбек қурбошилар ўртасида энг кучлиси бўлган бўлса, Шермуҳаммадбек шубҳасиз энг хавфлиси эди”¹.

Туркистон МИК раиси Иномжон Хидиралиевнинг кейинчалик ёзишича, “1920 йил сентябрида босмачиларнинг сони 70.000 кишига етди ва кучли ваҳима уйғотди”².

Фаргона армия гурухининг қўмандони Коноваловнинг кейинчалик СССР Қуролли кучларининг Бош қўмандони С. С. Каменев номига ёзган маърузасида айтилишича, “Фарғонада босмачилик 1920 йил сентябрь ойида ўзининг энг юқори чўққисига чиқди, яширин ҳолда ишлаётган мусулмон ташкилотлари ўз фаолиятларини бутун совет Фарғонасида авж олдиридилар ва Туркистонда совет ҳокимиятига қарши қўзғолон кўтаришга тайёрландилар”³.

¹ Кувшинов В. Ферганский район //Военная мысль, 1920. 1-китоб, 260-бет.

² Ўзбекистон МДА, 25-фонд, 1-рўйхат, 300-иш, 33-вараж.

³ Ўзбекистон МДА, 17-фонд, 3-рўйхат, 36-иш, 107-вараж (махфий фонд).

Туркистондаги истиқлолчилик ҳаракатининг уюшган бир шаклда намоён булишида қуйида номлари зикр этиладиган шахслар — ҚҰРБОШИЛАР күрсатган файратшижоатни алоҳида таъкидлаб үтиш керак. Ўз вақтида Фарғона водийсидаги Кичик ва Катта Эргашлар, Мадаминбек, Шермуҳаммадбек, Ислом Паҳлавон, Ёрмат Махсум, Холхўжа Эшон ва Мұхиддинбек; Самарқанд вилоятіда Очилбек ва Баҳромбек; Бухоро халқ жумҳуриятидаги Сайд Олимхон (собиқ амир), Иброҳимбек лақай, Мулла Абдулқаҳдор, Анвар Пошо, Салим Пошо, Давлатмандбек, Жабборбек, Остон Қоровулбеги, Үрмон Полвон, Ҳайит Полвон, Фузайл Маҳдум, Дониёлбек; Хоразм халқ жумҳуриятида Жунаидхон, Ғуломалихон, Темир Алихон каби құрбошилар бу ҳаракатни ягона кучга бирлаштириш учун раҳбарликни бирин-кетин ўз құллагрига олсалар-да, лекин Фарғона водийси, Хоразм ва Бухородаги истиқлолчилик ҳаракати бошдан охиригача ягона марказға тұлиқ уюша олмади. Туркистан фидойиларининг озодлик ҳаракатини ягона марказға бирлаштириш учун событқадам ва изчил курашаёттан Мадаминбек билан Анвар Пошонинг тақдирлари эса фожеали тугади.

Истиқлолчилик ҳаракатини ташкилий жиҳатдан уюштиришда ҚҰРБОШИЛАР ҚУРУЛТОЙИНИНГ аҳамияти ҳам жуда катта бұлған. Шуни алоҳида таъкидлаш керак-ки, Фарғона водийси, Бухоро ва Хоразмдаги құрбошиларнинг мазкур даврда үтгиздан ортиқ қурултойлари булиб үтди. Ушбу қурултойларда раҳбарлар сайланған, құрбошилар ягона құмандонлик остида бирлаштирилған. Ҳолбукі, бунга ҳамма пайт ҳам амал қылымас эди. Шунингдек, қурултойда құрбоши дасталари ҳаракат қиладиган жойлар ва уларнинг таъсир доираси ҳам белгилаб олинған.

Туркистондаги истиқлолчилик ҳаракатининг **FОЯ-ВИЙ РАҲНАМОЛАРИ** ҳам етарли даражада мавжуд булиб, улар асосан жадид мунавварлари ва ислом уламолари эди.

Наманғанлик Носирхон Тура Сайд Камолхон Тура үғли, Тошкентлик муфтий Садриддинхон Махсум Шарифхўжа Қози үғли, Туркистан **МИК**нинг собиқ аъзо-

си, еттисувлик Тұрақул Жонузоқов, асли бошқирдистон-лик Ахмад Закий Валидий Түғон ва бошқалар истиқтол-чилик ҳаракатининг ғоявий мағкурачилари эди. Ҳа-ракатта раҳбарлик қылған ислом уламолари орасида яс-савиийлик ва нақшбандийлик тариқатининг пирлари күп булишган. Хорижлик тарихчи Мэри Броксаннинг ёзи-шича, Фарғонадаги энг қаҳри қаттиқ құрбоши Холхұжа Эшон яссавиийлик тариқатининг вакили булған. Ислом Паҳлавон ва Мулла Декон құрбошилар ҳам тасаввуф шайхлари эди. Бухородаги бир қатор құрбошилар нақш-бандийлик тариқатининг машхур пирлари ҳисобланиш-ган.

Туркистан, Бухоро ва Хоразм республикаларидағи жадидларнинг бир қисми бу пайтда совет ташкilotла-рида фаолият күрсатышса-да, миллий мустақиллик тұғрисидаги үз ғояларидан воз кечишмаган эди.

Бу даврда ташкил топған “Миллий иттиҳод” ва “Миллий истиқбол” фирмалари истиқболчилик ҳаракатининг кейинги ривожланишида мұхим үрин тутади. Архив ҳұжжатларыда ёзилишича, “Миллий иттиҳод” фирмаси 1920 йил охирида ёқ Файзулла Хұжаев бошчилиги-да Бухорода ташкил топған бұлса, 1922 йилда Акмал Икромов Тошкентде “Миллий истиқбол” фирмасини тұзған эди. Ушбу фирмалар биргаликда яширин равища истиқболчиларни құллаб-қувватлашади.

Бу маълумотни айрим архив ҳұжжатлари ҳам тас-диқлади. Демек, истиқболчилик ҳаракати ўша 1919—1922 йилларда ёқ МИЛЛИЙ ИСТИҚЛОЛ ғоялари би-лан маълум даражада қоролланған эди.

Шермуҳаммадбек бошчилигида тузилған Туркистан му-ваққат ҳукумати 1922 йил охирида тарқалиб кетишга маж-бур бұлды. Шермуҳаммадбек құрбошининг үзи эса қатор жанглардан кейин, 1922 йил декабрь ойининг сүнгги кун-ларыда Бухоро жумҳурияты ҳудудига, 1923 йилнинг баҳо-рида эса Афғонистон давлатига үтиб кетди¹. Унинг ке-йинчалик водийга яна қайтиб келиш тұғрисидаги барча ҳаракатларини совет ҳокимияти йүққа чиқарды. Мазкур

¹ Қаранг: РДХА, 28113-фонд, 7-рүйхат, 84-иш, 16-варақ.

воқеалар билан истиқолчилик ҳаракатининг катта бир босқичи тугади.

Фаргона водийсидаги ватанпарварлар қушинига 1923—1924 йилларда олдин ИСЛОМ ПАҲЛАВОН¹, кейин ЁРМАТ МАҲСУМ² каби қўрбошилар раҳбарлик қилдилар. Лекин қўрбошилар эрк ва истиқол курашининг мазкур учинчи босқичида турли сабаб ва маҳаллий шарт-шароитлар натижасида бир-бирлари билан доимо ҳам келишиб иш тутмадилар.

Қўрбошилар 1924 йилга келганда Фарғонадаги иқтисодий танazzул ва қашшоқлик, даҳшатли очарчилик, халқнинг оғир турмушини курмасликлари мумкин эмас эди. Тинимсиз давом этган етти йиллик курашдан Фарғона халқи ҳам, қўрбоши ва уларнинг йигитлари ҳам жуда-жуда толиқдан эдилар. Шунинг учун қассоскорларнинг кўпчилиги 1924 йил давомида қаршиликни тұхтатдилар. Улар кейинги жанглар учун ҳам куч тұплашлари лозим эди.

Хулоса қилиб айтганда, 1918 йил февралидан 1920 йил мартағача давом этган водийдаги истиқолчилик ҳаракатининг БИРИНЧИ БОСҚИЧИда даставвал Кичик ва Катта Эргашлар, сунгра эса Мадаминбек ватанпарварлар қушинига қўмандонлик қилдилар. Бу даврда Фарғонадаги истиқолчиларнинг кучлари 70.000 кишидан кам булмаган. Мадаминбек бошчилигидаги Фарғона муваққат мухторият ҳукуматининг 1919 йил октябрь ойида тузилиши истиқолчилик ҳаракатининг мантикий якуни бўлди.

1920 йилнинг баҳоридан бошлаб то 1922 йилнинг охиригача бўлган ИККИНЧИ БОСҚИЧда истиқолчилар қушинига Шермуҳаммадбек раҳбарлик қилди. Шермуҳаммадбек бошчилигига 1920 йил май ойида Туркистон-турк мустақил ислом жумҳурияти тузилди ва 1922 йил апрель ойида ушбу Туркистон муваққат ҳукуматининг вақтинчалик Конституцияси қабул қилинди. Қа-

¹ Ислом Паҳлавон 1923 йилнинг охирида қўлга олинив, узининг яқин сафдошлари билан бирга қатл қилинади.

² Ёрмат Махсум 1929 йилда Фарғона водийсида бўлган жангларнинг бирида ўлдирилади.

рийб уч йил давом этган ва асосан Шермуҳаммадбек номи билан чамбарчас боғлиқ ушбу босқичда истиқлолчилар водийдаги қизил армия жангчиларига қақшатқыч зарбалар беришга муваффақ бўлдилар. Туркистон муваққат ҳукумати ва Аҳмад Закий Валидий бошчилигида 1921 йил 5 августда Бухоро шаҳрида тузилган ТУРКИСТОН МИЛЛИЙ БИРЛИГИ ташкилоти¹ озодлик курашининг мантиқий ҳосиласи сифатида истиқлолчиларнинг ғоявий жиҳатдан жипслashiшида муҳим роль ўйнади.

1923—1924 йилларда давом этган УЧИНЧИ БОСҚИЧда истиқлолчилар кўшини кичик-кичик дасталарга бўлинган ҳолда водийда жанг ҳаракатларини олиб бордилар. Фарғонада кичик қурбоши дасталарининг миқдори 1923 йилда камида 350—400 та атрофида эди. Етти йиллик тинимсиз муҳорабадан чарчаган истиқлолчиларнинг аксарият қисми 1923 йилнинг охири ва 1924 йилнинг бошларига келиб, қуролни ташлашга мажбур булдилар. Фарғона водийси аҳолиси ҳам бу пайтта келиб, даҳшатли очарчилик ва урушлар натижасида деярли бутунлай қирилиб кетаётганд, яъни 1917 йилдаги 2,2 миллион кишидан 1924 йилнинг охирига келганда атиги 500.000 киши тирик қолган эди, холос. 1924 йилдаги жанглар натижасида Фарғонадаги миллий мухолафат вақтингчалик мағлубиятга учради. Шундай қилиб, 1924 йилнинг охирда Фарғона водийсидаги истиқлолчилик ҳаракатининг БИРИНЧИ ДАВРИ якунланди.

Лекин ҳали олдинда курашнинг тулиқ 10 йили турар эди. Ватанпарварлар яна Фарғона водийсида 1935 йилгача озодлик байроби ва мустақиллик яловини ҳилпирашиб, исломнинг яшил туғи остида босқинчи қизил армия қўшинларига қарши ҳаёт-мамот курашини олиб бордилар. Курашнинг ИККИНЧИ ДАВРИ 1925—1935 йилларни ўз ичига олган бўлиб, ўзининг характеристери ва кучлар нисбати жиҳатидан биринчи даврдан анча фарқ қиласди. Бу пайтда водийда ўнлаб қурбоши дасталари мавжуд бўлиб, улар имкониятлари доирасида мавжуд

¹ Zeki Velidi Togan. Hfifalar Turkistan ve diger musliman docu Turklerinin milli varlik ve rultur mucadeleleri İstanbul, 1969, S. 115.

тузумга қарши кураш олиб бордилар. Фарғона қўрбо-шиларининг сўнгги умумий етакчиси Ёрмат Махсум эди. Бу пайтдаги Фарғона қуролли мухолафатининг асосий манзили тоғлар орасидаги Сух тумани эди. Совет ҳокимияти Фарғона ватанпарварларини фақат 1935 йилдаги на бутунлай тор-мор келтиришга муваффақ була олди, холос.


ХОРАЗМ ҲАЛҚ ЖУМҲУРИЯТИДАГИ ИСТИҚЛОЛЧИЛИК ҲАРАКАТИ ВА УНИНГ ЎЗИГА ХОС ХУСУСИЯТЛАРИ

1917 йил Туркистонда юз берган воқеалар натижасида Хоразмдаги миллий озодлик ва демократик ҳаракат ҳам кучайди. Хива хонлигига миллатлараро муносабатларнинг кескинлашуви вазиятни янада оғирлаштириди. Мана шундай шароитда туркман уруғларидан бири бўлган ёвмутларнинг етакчиси Қурбон Мамед Сардор — ЖУНАИДХОН (1857—1938) айниқса кўзга ташлана бошлади. У Хоразмда сиёсий ҳокимият учун кураш бошлади.

Жунаидхон Хива хони ҳукмронлигидан норози бўлган тарқоқ туркман қабилалари ва уларнинг бошлиқларини нисбатан қисқа муддат ичидан бирлаштириди. 1918 йилнинг бошларига келганда унинг қўл остида энди бир ярим мингдан ортиқ қуролли отлиқлар бўлиб, у Хива хонига жиддий хавф туғдириб қўйган эди¹. Иродаси заиф ва аиш-ишратга уч Хива хони Асфандиёрхонни 1918 йил 30 октябрда Жунаидхоннинг ўғли Эшим бошлилигидаги сунқасдчилар гуруҳи ўз саройида пи-чиқлаб үлдирди. Амалда хонликнинг мутлақ ҳукмдорига айланган Жунаидхон үлдирилган хоннинг амакиси Саид Абдулахонни қўғирчоқ хон сифатида Хива таҳтига ўтқазди.

Жунаидхон номи тарих саҳифаларига мураккаб шахс ва зиддиятга тўла инсон сифатида битилган. Унинг фао-

¹Р. Ё. Ражабова ва б. Ўзбекистон тарихи (1917—1993 й). Тошкент. “Ўқитувчи”, 1994, 78—79-бетлар.



лияти ҳам шахсиятидек кескин ва фожеали, зафарли ва қайпули кечди. Олдин чор Россияси ва Хива хонига қарши савашган Жунаидхон 1919 йилнинг ёзидан бошлаб Тұртқұлдаги қызил аскарларга қарши мустақиллик курашини бошлади. Закий Валидий үзининг “Хотиралар” китобида Жунаидхонни “... оқ ва қызил мустамлакачиларига бош әммаган қаҳрамон”, — деб бежиз таърифламаган.

1919 йилнинг ноябрь, 1920 йилнинг январь ойларида бұлған шиддатли жанглар натижасида Жунаидхон қүшини қызил аскарлардан мағлубиятта учради. Жунаидхоннинг қароргоҳи Тахта қалъаси 20 январда құлдан кетди. Қызил армия қүшинлари 1920 йил 1 февралда хонликнинг пойтахти Хива шаҳрини әгалладилар. 2 февралда Саид Абдуллахон таҳтдан воз кечди. Жунаидхон асосий кучларини олиб Қорақұмдаги туркман овулларига чекинди. Полвонниёз Ҳожи Юсупов бошчилигидаги Ёш хива-ликлар янги тузилған Хоразм ҳукумати — Халқ Нозирлар Шуроси таркибиға кирған бұлсалар ҳам ҳокимиятнинг жилови аслида большевиклар қулида эди. Натижада Жумхурраис ПОЛВОННИЁЗ ҲОЖИ ЮСУПОВ ҳукумати амалга ошироқчи бұлған иқтисодий ва маданий тадбирлар бажарылмай қолди.

Жунаидхон қызил армиянинг босқинчилік сиёсатига қарши үз ҳаракатларини фаоллаштируди. Унинг қүшини сафида туркманлардан ташқари үзбек, қорақалпоқ ва қозоқтар ҳам күтчилик эди. Үзбек деңқонлари ва хунармандларидан иборат дасталарга Мадраимбай, Ота Махсум, Темир Алихон, Саъдулла бола, Шокир бола, Мавлонбек ва бошқалар раҳбарлық қилишди. Ҳусусан, Құхна Урганч, Илалли, Тошқовуз, Манғит, Құшқұпир, Чимбай, Құнғирот ва Тұртқұлда ҳаракат қылған үнлаб сардорларнинг дасталари қызил аскарларга сезиларли зарбалар берішди.

Түркистондаги большевикча режим Жунаидхонга қарши курашда айтарлы ютуққа эриша олмагач, “сопини үзидан чиқарыб” бошқа туркман уруғининг етакчиларидан фойдаланди. Туркистон республикаси раҳбарларидан бирининг тан олишича, “Жунаидхонга қарши курашда құққисдан унинг душманлари ҳисобланмиш Фуломалы ва

Құшмамедхон деган туркман йұлбошчилари құшилиб қолишиди. Натижада биз икки урганинг үзаро курашувига эришдик, Жунаидхон эса Фуломали ва Құшмамедхон ёрдамида бизнинг қизил армиямиз томонидан ҳарбий құшилма сифатида янчиб ташланди”¹.

Иши битиб, әшаги лойдан үтган қизил армиячилар Фуломали ва Құшмамедхон гурухларини тутатышга қарор қылдилар. 1920 йил сентябрда ҳеч нарсадан шубҳаланмай Хива шаҳрига қайтиб келган — туркман уруғларининг бу икки йұлбошчиси Халқ Нозирлар Шуросининг аъзоси ҳам бұлган Құшмамедхон ва Фуломали йигитлари устига қизил аскарлар ташланишади. Хоинларча ҳибсга олинган Құшмамедхон орадан бир неча соат үтгач, узининг “яқин ёрдамчилари” томонидан чопиб ташланади. Фуломали бұлса қочиб, истиқололчилар қаторига үтиб кетди². Бундай муносабатни курган Хоразм Халқ Нозирлар Шуросининг бир нечта аъзоси ҳам Жунаидхон қүшинлари сафига бориб қүшилди. Хоразмлик йигитлар ҳам унинг лашкарлари сафини тұлдиришди. Оғажон Эшон Жунаидхоннинг пири сифатида бутун ислом лашкарларининг foilavий раҳнамоси зеди.

Натижада 1923 йилнинг охири ва 1924 йил бошида Жунаидхон қулида жуда катта миқдордаги ҳарбий күч күдрат тұпланди. Хоразм жумхуриятининг күплаб шаҳар ва қишлоқлари унинг тасарруфига үтди. 1923 йил декабрь ойида Питнак, Ҳазорасп, Богот, Хонқа тумандарыда совет ҳокимиятига қарши деңқонларнинг оммавий құзғолонлари бошланиб кетди. Құзғолончилар ушбу жойлардаги совет ташкилотларини тутатиб, мамлакат пойтахти Хива шаҳри устига юриш қылдилар. Қорықумда турған Жунаидхон қүшинлари ҳам фарб томондан келиб, бир вақтнинг үзида шаҳарни қуршаб олишди³.

1924 йил 10 январдан бошлаб Жунаидхон бошчилигидаги 15.000 кишилик пиёда ва отлиқлар қүшини Хива шаҳ-

¹ Узбекистон МДА, 17-фонд, 1-рунхат, 90-иш, 326-варап.

² Узбекистон МДА, 17-фонд, 1-рунхат, 90-иш, 327-варап.

³ История Бухарской и Хорезмской Народных Советских Республик. Москва, “Наука”, 1971, 162-бет.

рини қамал қилишга киришди¹. Қўзғолончилар январь ойининг охирларида келганда шаҳар ичига ёриб кириб, айрим кучаларни эгаллашди. 26 январь кечқурун булган жанглар айниқса шиддатли кечди. Хива шаҳри ичидагизил аскарлар билан булган ушбу жангда Жунаидхоннинг қариндоши Байрамалихон үлдирилиб, унинг ўзи ярадор қилинди.

Февраль ойининг бошларига келиб Хива шаҳрига 4-Актюбинск ва 82-Туркистан отлиқлар полки ва авиа-эскадрильяси, Тошкент ва Тўртқўлдан қизил аскар қисмлари олиб ташлангач, Жунаидхон бошчилигидаги ватанпарварлар қушини қарийб бир ой давом этган қамални тўхтатиб, орқага чекинишга мажбур бўлдилар. Тошкент ва Москвадаги совет ҳокимиётини зир титратган “кум бургути” — Жунаидхоннинг бу зарбаси унинг сунгти ҳамласи эмас эди.

Лекин 27 февралда Жунаидхоннинг Қўйи Балиқлидаги қароргоҳи қизил аскарлар томонидан босиб олинди². 1924 йил март-апрель ойларида булган жанглар натижасида фақат авиациянинг ёрдами билангина Қоракумдаги Жунаидхон қўшинларининг асосий қисми тор-мор келтирилди³. Оғажон Эшон ва бошқа сардорлар асирга олингач⁴, Жунаидхон 1924 йил 17июнда ўзининг 20 та ҳамроҳи билан Афғонистондаги Ҳирот шаҳрига етиб келди⁵. Архив ҳужжатларида келтирилишича, у бу ерда туриб ўз қўшинлари сафини тўлдиришга ҳаракат қылган ва вақтвақти билан Туркманистон орқали Хоразм устига юришларни уюштирган.

Жунаидхоннинг ёши бу пайтга келиб етмишдан ошиб қолганига қарамасдан, у ҳали тетик ва бақувват эди. Умрининг ярим асрдан ортиқ вақтини босқинга қарши курашиб отда ўтказган Жунаидхон Афғонистон ва кейинчалик Эрондан Туркманистон орқали Хоразм ҳудудига ўтиб, совет армияси жангчиларига қарши навбатдаги кес-

¹ РДҲА, 157-фонд, 2-рўйхат, 752-иш, 148-151-варақлар.

² РДҲА, 110-фонд, 2-рўйхат, 532-иш, 54-варақ.

³ Ўзбекистон МДА, 71-фонд, 1-рўйхат, 42-иш, 24-варақ.

⁴ РЦХИДНИ, 17-фонд, 16-рўйхат, 1177-иш, 19-варақ.

⁵ История Хорезмской Народной Советской Республики. Сб. документов. Ташкент, “Фан”, 1976, 262-бет.

кин ва аёвсиз зарбаларни бергач, бепоён Қоракүм чұлла-рида фойиб бўлар эди. Маршал С. М. Будённийнинг са-раланган маҳсус отлиқ қушини ҳам Жунаидхонни құлга тушира олмади. Ҳозирги Туркманистон Республикаси худуди ва Хоразмда айрим танаффуслар билан 1931 йил-гача кураш олиб борган Жунаидхон ниҳоят Эрон давла-тига бутунлай үтиб кетди ва муҳожирликда ўша ерда 1938 йили вафот этди. Баъзи манбаларда ёзилишича, унинг жасади Эрондан келтирилиб ўзи туғилиб ўтсан Тахта туманидаги Бадиркент қишлоғидаги қабристонда яширин-ча дағн өтилган.

БУХОРО ХАЛҚ ЖУМҲУРИЯТИДАГИ ИСТИҚЛОЛЧИЛИК ҲАРАКАТИ

1920 йил 2 сентябрда М. В. Фрунзе бошчилигидаги 70 минг кишилик қызил армия қисмлари¹ Бухоро шаҳрида АМИР САЙД ОЛИМХОННИ (1881—1944 й.) таҳтдан ағда-риб ташладилар. Натижада Бухорода қызил аскар наизалари остида “халқ инқилоби” ғалаба қозонди. Муқаддас Бухорои шариф большевиклар томонидан қызил Бухорого айланти-рилди. ФАЙЗУЛЛА ХЎЖАЕВ (1896—1938 й.) бошчилитида-ги жадидлардан иборат Ёш бухороликлар фирмаси Бухоро коммунистик партияси билан қўшилишга мажбур бўлди². Бухоронинг турли жойларида инқилобий қўмиталар тузилди. Собиқ амирнинг жўнаб кетишга улгурмаган амалдорла-ри ва сарой аъёнлари, нуфузли руҳонийлар қамоққа олинди ва большевиклар томонидан отиб ташланди³.

Файзулла Хўжаев бошчилигидаги Бухоро жумҳурияти Халқ Нозирлари Шўроси⁴ ана шундай жуда оғир бир ва-

¹ Қаранг: Крушельницкий А. Бухарская революция. Диктатура по те-леграфу. Родина, 1989, № 11, 33-бет.

² Бугун ўзини “тарихчи” ва “сиёсатдон” деб ўйлаётган, аслида эса давр маддоҳлари бўлган айрим кимсалар даъво қилаётганидек, Ф. Хўжаев Бухородаги инқилобий жараёнга коммунист сифатида эмас, балки жадид сифатида келиб қўшилган. У Туркистон мустақиллиги учун мус-табид совет режимига қарши имконияти доирасида кураш олиб борган эди. Бу тарихий ҳақиқатни кўплаб архив ҳужжатлари тасдиқлайди.

³ Кастанье Ж. Бухарская республика // Позиция, 1993, №1, 16-бет.

⁴ Қаранг: Хўжаев Файзулла. Бухоро инқилобининг тарихига матери-аллар. Тошкент. “Фан”, 1997, 173-бет.

зиятда иш бошлади. Амирлик тузумидан қолган оғир мөрөс, ўрта асрчилик анъаналари, Бухоро қишлоқларидаги қолоқлик, аҳоли ўртасида мутаассиб руҳонийларнинг нуфузи баландлиги ва бошқа бир қатор сабаблар “... шунга олиб келдик, амалга оширилиши унчалик қийин бўлмаган бир қанча тадбирлар, шуничгдек, хужалик ва маданий курилишнинг бутун программаси маълум даражада қофозда қолиб кетди”¹.

Бухоро жумхуриятидаги истиқдолчилик ҳаракати ўзининг мураккаб ва зиддиятли, айни пайтда, шонли ва зафарли тарихига эга. Бу ердаги ҳаракатнинг Туркистондан, хусусан, Фарғона водийсидаги истиқдолчилик ҳаракатидан фарқ қиласидиган асосий томони шундан иборатки, ватанпарварлар Бухорода икки жабҳада туриб кураш олиб боришларига тӯғри келди. Бир томондан, амирлик тузуми тарафдорлари бўлган МУЖОҲИДЛАР² жадидлардан иборат ёш Бухоро ҳукуматига ва шунингдек, қизил армия қўшинларига қарши кураш олиб бордилар. Уларнинг пировард мақсади Бухорои шарифда амир Саид Олимхоннинг ҳокимиятини қайта тиклаш, қизил аскарлар ва коммунистлар билан биргаликда, уларнинг таъбирича, “коғирларга сотилган жадидлар” ҳуку-

¹ Ф. Ҳўжаев. Бухородаги революция ва Ўрта Осиёнинг миллий чегараланиши тарихига доир. Ф. Ҳўжаев. Таъланган асарлар. 1-том. Тошкент. “Фан”, 1976, 244-бет.

² Арабча “мужоҳид” сўзининг лугавий маъноси “эътиқод учун курашувчи киши” демакдир. “Мужоҳидлар” деб ўша пайтда Бухородаги қизил армияга қарши курашган кишилар айтилган. Лекин бу номга сазовор бўлиш жуда қийин бўлган. Архив ҳужжатларида келтирилишича, фақат нуфузли шахсларнинг тавсияси билан ватанпарварлар қўшинига қабул қилинган кўнгиллилар “мужоҳидлар” деб аталган. Босқинчиларга қарши курашган фидойи мужоҳид боболаримизни Афғонистон ва Тожикистонда ҳозир ҳам бир-бирiga қарши жанг қилаётган турли гуруҳлар ва ислом дини ниқоби остида фаолият кўрсатадиган айрим тўдалар билан чалкаштираслик лозим. Кўнгиллилардан ташқари қўшинида маҳаллий аҳоли ўртасидан сафарбар қилинган йигитлар ҳам бўлганки, улар “аскар” деб номланган.

Шунинг учун ҳам мазкур тадқиқотда Бухоро жумхуриятида 1920—1924 йилларда босқинчи қизил армия жангчилари ва советча режимга қарши мустақиллик курашини олиб борган ватанпарвар аждодларимиз истиқдолчилар ва мужоҳидлар деб номланди. Халқимизнинг асл фарзандлари иштирок қиласидан бўлган бу ҳаракат мос равишда истиқдолчилик ҳаракати деб аталди.

матини ҳам йуқотиш эди (Иброҳимбек, Мулла Абдул-қаҳҳор ва б.). Иккинчи томондан, миллий истиқлол фояларига содик бўлган бухоролик ватанпарварлар Файзулла Хўжаев бошлиқ Бухоро Ҳалқ Жумҳурияти ҳукумати билан яширин алоқалар ўрнатиб, Бухоронинг муқаддас тупроғидан қизил аскарларнинг олиб кетилиши, Бухоро жумҳуриятининг мустақиллиги амалда қарор топиши учун курашдилар (Анвар Пошо, Давлатмандбек, Жабборбек, Дониёлбек ва б). Айнан улар сафига кейинчалик Бухоро жумҳуриятининг жуда кўпчилик раҳбарлари (Бухоронинг биринчи жумҳурраиси Усмонхўжа Пўлатхўжаев, Чека раиси Муҳиддин Махсум Хўжаев, республика милициясининг бошлиғи Али Ризо Афанди, Шеробод вилояти нозири Ҳасан Афанди, Термиз милициясининг бошлиғи Усмон Афанди, ҳарбий ишлар нозири Абдулҳамид Орипов, шунингдек, Сурайё Афанди, М. Кулмуҳамедов ва б.) қушилдиларки, бу арбобларнинг асосарияти кечаги жадидлар ва Ёш бухороликлар эди¹. Бухородаги бу ҳаракат Анвар Пошонинг келиши билан ўзининг юқори чўққисига кўтарилдики, 1921 йилнинг қиши ва 1922 йилнинг баҳор-ёзида бутун Туркистондаги сиёсий жараёнларнинг маркази айнан Шарқий Бухорога кўчгани ҳам бежиз эмас эди. Афсуски, Анвар Пошонинг ӯлими билан бу ҳаракат “яхлит бир уюшган сиёсий кураш” даражасидан оз бўлса-да пастга тушди. Шарқий Бухородаги қўрбошиларни бирлаштирувчи кучяна Иброҳимбек сиймосида намоён бўлган бўлса ҳам улар билан Бухоро ва Кармана (Фарбий Бухоро), Қашқадарё ва қисман Сурхондарё (Ўрта Бухоро) вилоятларидағи ис-

¹ Афсуски, Файзулла Хўжаев бошчилигидаги Бухоро ҳукумати таркибидаги миллий ватанпарвар кучлар (собиқ Ёш бухоролик жадидлар) билан муҳолафатдаги қуроли истиқлол гуруҳларининг йўлбошлилари ўртасидаги очик келишув амалга ошмади. Агар ушбу келишув амалга ошганда эди, бу нодир ҳодиса Туркистон халқлари миллий озодлик ҳаракати тарихидаги кескин бурилиш нуқтасини ташкил қиласа бўларди. Ҳолбуки, ҳар иккى томон ҳам миллий бирлик, тинчлик ва муросага қараб интилган эди. Ҳар иккى томоннинг ҳам пировард мақсади Туркистонни яхлит ва бир бутун ҳолда ҳақиқий мустақил давлат ҳолида куриш эди. Лекин уларнинг бу орзулари тоталитар режим ҳукм сурған даврда амалга ошиши мумкин ҳам эмас эди.

тиқлолчилар ўзаро ҳамкорликда иш олиб бормадилар. Аниқроқ айтганда, Бухоро жумҳуриятидаги ватанпарварлар доимо ҳам ягона бир қўмондан қўли остида ва яхлит бир дастур асосида фаолият юрита билмадилар.

Бухородаги истиқлолчилар сафида худди Фарғона воийсида бўлгани сингари ҳалқнинг барча табақаларига мансуб кишилар бор эди. Деҳқонлар ва ҳунармандлар қўрбоши йигитларининг асосини ташкил қиласарди. Ҳаракатнинг етакчилари бўлган қўрбошилар ҳам фақат катта бой ва йирик дин арбоблари бўлмасдан, улар орасида зиёлилар, жадид ватанпарварлари, турли касб эгалари кўпчиликни ташкил этарди.

“Босмачилик ҳаракати, — деб сал кейинроқ ёзган эди Файзула Хўжаев “Катта Совет Қомуси”да, — шиддатли сиёсий, аксилсовет хусусият касб этди ва бутун Ўрта Осиёнинг мавжуд уч республикаси — Бухоро, Туркистон ва Хоразмдаги деҳқонлар аҳолисининг деярли оммавий ҳаракатига айланди. Ҳаракатнинг доҳийлари фақатгина босқинчи тудаларининг Кўршермат, Иброҳимбек каби алоҳида бошлиқлари бўлиб қолмасдан, балки унга маҳалий миллий зиёлилар, мулла ва бойлар ҳам раҳбарлик қила бошладилар”¹.

Бухородаги истиқлолчилик ҳаракатининг ўзига хос томонларини кўрсатишда бир гуруҳ қўрбошиларнинг уша даврда Бухоро Ҳалқ Жумҳурияти ҳукумати раҳбарларига йўллаган мактуби характерлидир. Ф. Хўжаевнинг “Бухородаги революция ва Ўрта Осиёнинг миллий чегараланиши тарихига доир” номли асарида тўла матни келтирилган ва унинг китобларида ҳатто совет даврида ҳам ҳеч қандай ўзгаришсиз эълон қилинган ушбу мактубда Бухородаги истиқлолчилик ҳаракатининг асосий моҳияти лўнда қилиб кўрсатилади. Истиқлолчилар Бухоронинг мустақиллиги учун, эркин ва ҳур Ватан қуриш учун курашаётганликларини, бундай Ватанда коммунистлар бўлмаслиги лозимлигини, “Фавқулодда комиссия орқали камбафал аҳолининг мол-мулки ва ҳаёти тортиб” олинганилигини,

¹ Ф. Ходжаев. Басмачество. Большая Советская Энциклопедия. 5-т. М. 1927, 36-бет.

“большевиклар жабр ва зулмни авж олдириб” юборган-ликларини ва “Бухоронинг мустақиллиги қуруқ суз булиб” қолганлигини, “ҳақиқатда ундан дарак йўқ” лигини¹ таъкидлашади.

Шу жиҳатдан қараганда Ф. Ҳужаев томонидан РСФСР ташқи ишлар вазирининг ўринbosари Л. М. Карабанномига ёзилган хат ҳам дикқатга сазовордир. Ф. Ҳужаев ушбу хатда Бухоро республикасидаги бу ҳаракат қисқа муддат ичидаги оммавий тус олганлигини, хусусан туркиялик ҳарбий саркарда Анвар Пошо Шарқий Бухорога боргач, истиқлолчилар ҳаракати энг авж нуқтага кутарилганлиги, ҳатто бу ҳаракат Шарқий Бухорода Фарғона водийсидаги истиқлолчилик ҳаракатига нисбатан ҳам кучайиб кетганлигини эътироф этади. Ф. Ҳужаевнинг ҳаққоний равишда таъкидлашича, “Шарқий Бухородаги босмачилик ўзининг стратегик мавқеи жиҳатидан қараганда, Фарғона босмачиларига нисбатан кучлироқ”².

Агар Шарқий Бухородаги истиқлолчиларнинг энг зафарли фалабаси Душанбенинг қўлга олиниши бўлса, Фарбий Бухородаги курбоши гурухлари ҳам миллий озодлик ҳаракати тарихига зарҳал саҳифалар билан битиладиган қатор ютуқларни қўлга киритишиди. МУЛЛА АБДУЛҚАҲ-ҲОР (1884—1924 й.) бошчилигидаги истиқлолчиларнинг катта армияси 1922 йилнинг бошида Бухоро жумҳурияти пойтахти Бухоро шаҳри устига юриш қилишиди. Улар қизил аскарлар билан Сарипул-Меҳтар Қосим кўприги олдида бўлган икки кунлик шиддатли жанглардан сўнг Бухоро шаҳрининг катта бир қисмини эгаллашди ва бир неча соат мобайнида шаҳарни ўз қўлларида тутиб туришиди. Истиқлолчиларнинг ушбу фалабаси ҳақида собиқ амир Сайд Олимхон ўз хотираларида бундай деб ёзган эди: “Мулла Абдулқаҳор большевиклар устидан зафар қозонди, яна Бухоро шаҳри теварагини ўраб олди, натижада, шаҳарнинг олти дарвозасини эгаллади. Шу билан у большевикларни сиқиб чиқариб, Бухорони бўшатди... Тўрт соатдан кўпроқ бу ерда туриб, кейин шаҳар ичкарисидан чиқиб Баҳоуддинга борди, у ерда ўн соат жанг қилиб, у

¹ Қаранг: Ф. Ҳужаев. Танланган асарлар. I-том, 249-бет.

² Ф. Ҳужаев. Танланган асарлар, 1-том, 461-бет.

ерни ҳам большевиклар қулидан ҳалос қилди. Абдулқаҳ-ҳор Бухоро ва Баҳоуддиндан қўлга анчагина улжа киритди”¹.

Аммо зудлик билан Тошкент ва Москвадан етиб келган кўп сонли қизил аскарлар билан бўлган жангда Бухорои шариф ва Баҳоуддин зиёратгоҳидан чекинишига мажбур бўлишди. Истиқлолчиларнинг кўп қисми асирга олинди.

Бу воқеалардан сўнг Мулла Абдулқаҳҳор йигитлари яна икки йилдан зиёд вақт мобайнида қизил аскар қисмлари билан ҳаёт-мамот жангларини олиб боришли. Ҳар икки томон аскарлари уртасида 1924 йилнинг ёзи ва кузида Фиждувон туманининг Фишти ва Катта Famхўр қишлоқларида, Нурота тоғларида, Шофиркон туманига туташ Қизилқумнинг Жилвон кўмликларида, Бофияфзал ва Вардонзе қишлоқларида қаттиқ тўқнашувлар бўлди². Кучлар тенг бўлмаган ушбу жангларда Фарбий Бухоро ватанпарварларининг етакчиси мағлубиятга учради. Фарбий Бухородаги қурбоши дасталарига сезиларли зарба берилиди. Мулла Абдулқаҳҳор қурбоши 1924 йилнинг охирида Қизилқум чўлларида қизил аскарлар билан бўлган тўқнашувларнинг бирида үлдирилди³.

Собиқ Бухоро амирлиги ўрнида ташкил топган Бухоро жумҳуриятидаги ватанпарварлар қизил армия қисмларига қарши қарийб 5 йил давомида шиддатли жанг ҳаракатларини олиб боришли. Бу курашда бухороликлар фаяқат ўз кучлари ва ички имкониятларига суюниб, жаҳондаги энг кудратли ҳарбий давлатнинг тиш-тирногигача қуролланган армиясига қарши тура олдилар. 1924 йилнинг охири ва 1925 йилнинг бошларига келганда ҳозирги Бухоро, Навоий, Қашқадарё вилоятларидаги мужоҳидлар ҳаракати қисман мағлубиятга учради. Шундай қилиб, Бухоро жумҳурияти ҳудудидаги истиқлолчилик ҳаракатининг БИРИНЧИ ДАВРИ поёнига етди.

¹Амир Сайид Олимхон. Бухоро халқининг ҳасрати тарихи. Тошкент. “Фан”, 1991, 19-20-бетлар.

² Қаранг: Ўзбекистон МДА, 48-фонд, 1-рўйхат, 48-иш, 621-623-вараклар.

³ Қаранг: История Бухарской Народной Советской Республики. Сборник документов. Ташкент. “Фан”, 1976, 171-бет.

Бухоро ватанпарварларининг кўп қисми ўз юртларининг мустақиллиги ва озодлиги учун курашларда қурбон бўлдилар. Тирик қолган фидойиларнинг аксарияти эса беш йиллик тинимсиз жанглардан жуда чарчаган ва толиқдан эди. Шунинг учун ҳам уларнинг кўпчилиги совет ҳокимияти вакилларига таслим бўлди. Таслим бўлишни хоҳламаган минглаб истиқлолчилар эса Афғонистон ва бошқа хорижий давлатларга муҳожир бўлиб жўнаб кетишли. Улар билан биргаликда ўн минглаб буҳороликлар ҳам ўзларининг киндик қони тўкилган таъбаррук ва муқаддас тупроқни ташлаб, Ватан сарҳадларидан чиқиб кетишга мажбур бўлдилар. Манбаларда буҳоролик муҳожирлар 400.000 кишидан иборат бўлганлиги келтирилади.

Лекин ҳали кураш давом этар эди. Мустабид совет тартибларига қарши собиқ Бухоро жумҳуриятида, хусусан, ҳозирги Сурхондарё вилояти ва Тожикистон Республикаси ҳудудида ватанпарварлар яна ўн йил давомида (1925—1935 йиллар) ҳаёт-мамот жангларини олиб боришиди. Ўзбекистон ССРда 20-йилларнинг охирида колективлаштиришнинг мажбурий суратда ўтказилиши, аҳолининг аксарият қисмини “сен-муштумзурсан” деб асоссиз равишда бадарфа қилиниши ва қамоқча ташланиши оқибатида кураш қайтадан авж олди. Ўзбекистоннинг ҳамма жойида бўлгани каби ҳозирги Бухоро, Навоий, Қашқадарё, Сурхондарё вилоятларида ҳам ҳалқнинг кўпчилик қисми советларга қарши курашга кутарилди. СССР катта куч-файрат сарфлаб, Бухоро заминидаги истиқлолчилик ҳаракатини ҳам бутун Туркистон тупроғида бўлгани сингари фақат 1935 йилга келибгина тор-мор қила олди, холос.

Хулоса қилиб айтганда, Бухоро жумҳуриятидаги истиқлолчилик ҳаракати ўз ривожланиш жараённада икки катта даврни босиб утди. **БИРИНЧИ ДАВР** 1920—1924 йилларни ўз ичига олган бўлиб, унинг ўзи ҳам уч босқичдан иборатдир. **БИРИНЧИ БОСҚИЧда** (1920 йилнинг кузи—1921 йилнинг октябри) собиқ амирлик ҳудудида истиқлолчилик ҳаракати бошланди. Дастреб Шарқий Бухорода юзага келган ушбу ҳаракат тез орада бутун Бухоро жумҳурияти ҳудудини қамраб олди ва дастребки порлоқ

ғалабаларга эришди. Ҳаракатнинг ИККИНЧИ БОСҚИЧИ (1921 йилнинг ноябрь 1922 йилнинг августи) унинг энг кучайган даври булиб, бу бевосита АНВАР ПОШОННИНГ (1881—1922 й.) Бухорога келиши билан боғлиқдир. Истиқлолчилар бу пайтда деярли бутун Шарқий Бухорони (Тожикистоннинг ҳозирги пойтахти Душанбени ҳам) қизил аскарлар қулидан озод қилишди. Фарбий Бухорадаги мужоҳидлар ҳам Мулла Абдулқаҳор бошчилигига жумхурият пойтахти Бухоро шаҳрининг катта қисми ва унинг атроф туманларини эгалладиларки, бу воқеа истиқлолчилик ҳаракати тарихига зарҳал саҳифалар билан ёзилди. УЧИНЧИ БОСҚИЧДА (1922 йилнинг сентябри 1924 йилнинг охири) ҳарбий ҳаракат асосан икки йўналиш: Шарқий Бухорода ИБРОҲИМБЕК (1889—1932 й.) бошчилигига ва Фарбий Бухорода МУЛЛА АБДУЛҚАҲОР етакчилигига кечди. Бу пайтда Иброҳимбек, Салим Пошо, Мулла Абдулқаҳор ҳаракатта умумий равишда раҳбарлик қилдилар. 1924 йилнинг охирида Туркистон минтақасида миллий-худудий чегараланиши ўтказилиши натижасида Бухоро жумхурияти ҳудуди янги тузилган Узбекистон ССР, Туркманистон ССР ва Тожикистон АССР таркибига киритилди.

Ҳаракатнинг ИККИНЧИ ДАВРИ 1925—1935 йилларни уз ичига олади. Бу давр ҳам бир нечта босқичлардан иборатдир. Бу пайтда кураш асосан Шарқий Бухоро (ҳозирги Тожикистон Республикаси ҳудуди) ва Узбекистон Республикасининг ҳозирги Сурхондарё ва Қашқадарё вилоятларида кечди. Ҳаракатга умумий қўмондон Иброҳимбек қўрбоши эди. У айrim узилишлар билан истиқлолчилар қўшинини 1931 йил ёзиғача бошқарди.

ИСТИҚЛОЛЧИЛИК ҲАРАКАТИ: ЯКУН ВА ХУЛОСАЛАР

Туркистон минтақасидаги истиқлолчилик ҳаракати 1935 йилга келиб тўлиқ мағлубиятта учради.

Туркистондаги барча туб халқлар юрт ҳимояси учун булган қонли курашда, ҳаёт мамот жангларида пировардида енгилди.

Истиқлолчилик ҳаракатининг мағлубиятга учраши сабблари тұғрисида фикр юритганда, яна бир мұхим омилни айтмасдан утиб бўлмайди. Юз минглаб кишилар мустақиллик ва истиқлол учун, эрк ва эътиқод учун курашаётганларида, улкан муҳорабада қаттол душман билан жон олиб, жон берәётганларида, ватанпарварлар армиясида баъзан ўз манфаатини юрт озодлиги ва Ватан туйғусидан устун қўйган каслар, айрим босқинчи ва талончи кишилар ҳам бўлган. Ҳақиқатни айтганда, бундай кишилар ҳамма давр ва ҳамма замонларда топилади, уларнинг уруғи ҳозир ҳам бисёр. Қурбошилар жипслик ва ҳамжиҳатликка, узаро бирлик ва иттифоққа доимо ҳам амал қилмаганлар. Айрим қурбошилар фақат ҳаракатга раҳбарлик қилиш тұғрисида ўйлаб, бош қўмондонларига бўйсунмаганлар. Бундан қизил армия раҳбарияти ва большевиклар устомонлик билан фойдаланишган. Улар махсус хуфялар ва жосуслар ёрдамида ҳаракат сафларидаги бирликни парчалашга, қурбошилар ўртасидағи тарқоқлик ва узаро ихтилофларни янада авж олдиришга уринганлар, баҳтга қарши, босқинчилар аксарият ҳолларда ўз қабих режаларини амалга оширишга муваффақ ҳам бўлганлар. Туркистон халқлари ўртасидағи әзалий тарқоқлик, ягона муштга бирикиб зарб беришнинг қийинлиги, бирлаша олмаслик туйғуси ва ўзбилармөнлик бу тал ҳам панд берди. Бунинг устига, маҳаллий халқлардан чиққан айрим сотқин касларнинг Шимолдан келган босқинчилар билан оғиз-бурун упышиб кетганлиги ҳаракатни ичдан емиришга замин тайёрлади. “Ўзингники ўзагингни суғуриб олади” деганларидек, ушбу миllat хоинлари ва ватанфуруушлар қўрбошилар лашкарлари ўртасида ваҳимали миш-мишлар тарқатишиди, мужоҳидларни асосий курашдан чалғитиб, уларни талончиликка даъват қилишиди, советларга хайриҳоҳликда шубҳаланилган тинч аҳолини аёвсиз қириб ташлашиди. Яна бир мұхим ҳолат. Махфий ҳужжатларда ёзилишича, қизил армия жангчилари кўпгина ҳолларда кечалари мусулмонча кийиниб, қишлоқларга бостириб кирганлар. Совет қўмондонлигининг ташвиқот машинаси бўлса, бу босқинларни “босмачилар” уюштирди, деб маҳаллий халқни мунофиқларча алдаган. Ишонув-

чан ва содда туркий отанинг болалари яна бир марта маккор душман тузогига илингандар, бу макр-ҳийланнинг қурбони бўлганлар. Буюк ватанпарвар боболаримиз тўккан қутлуғ қон беҳуда кетмади. Туркистондаги истиқлолчилик ҳаракати Ўзбекистон Республикасининг мустақиллигига эришиш учун бўлган курашлар босқичида муҳим роль ўйнаб, Ватанимиз янги тарихининг энг шонли саҳифаларини ташкил қиласди.

Қаҳрамон Кенжасевич Ражабов,
тарих фанлари номзоди

Мустақил Туркистон фикри
учун мұжодалалар
(1917—1935 йиллар)

Ўзбек тилида

“Ўзбекистон” нашриёти — 2000,
Тошкент, 700129, Навоий, 30.

Бадий мұхаррир *T. Қаноатов*
Техник мұхаррир *У. Ким*
Мусағызы *M. Йұлдошева*